

*ASO GAFUA, 25 IUNI 2018*

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**SAUNOAGA FAAFEILOAI A LE FOFOGA FETALAI**

**FOFOGA FETALAI:** Ou te faasilasila atu ua amatalia nei Tausalumaga ma Galuega a le Fono Aoao Faitulafono.

E avea foi lenei avanoa ou te faatalofa atu ai ma le agaga faaaloalo i le paia o le Palemene, i le afio o lau Afioga i le Taitai o le Malo, le mamalu o le Kapeneta faapea foi Minisita Lagolago, Taitaifono ma sui usufono mamalu o le Palemene, ua mafai ona tatou faatasi i lenei taeao. Malo le lagi e mama, malo le soifua manuia.

E faatalofa atu foi i le aufaigaluega galulue a le Malo i Faaluuluga o Matagaluega ma Faalapotopotoga eseese a le Malo, aemaise foi o ofisa ma matagaluega o lo o faapena ona tofu sao i le faatinoga o le tatou galuega i lenei taeao. Malo le soifua, malo foi le lagi e mama i lenei taeao fou.

**TULAFONO TAU FAAOFI O TEUTEUGA O LE TULAFONO O  
AOGA 2018 – felafolafoaiga i luga o le faitauga faalua, faaaau mai le  
aso 22/6/2018**

**FOFOGA FETALAI:** E manava le galuega i lena vaiaso ua tuanai, ua maea ona saunoa sui usufono mamalu e tusa ai o le Tulafono Tau Faaofi. Ma ou te tapa ma le faaaloalo lau Afioga i le Minisita mo Aoga, Taaloga ma Aganuu e te saunoa e talifua itau i mea sa laga e sui usufono e tusa ai o le Tulafono Tau Faaofi e pei ona talanoaina.

Ou te tapa ma le faaaloalo lau Afioga i le Minisita mo Aoga.

**Afioga Hon LOAU SOLA KENETI SIO (Minisita mo Aoga, Taaloga ma Aganuu):** Faafetai atu i lau Afioga i le Fofoga Fetalai mo le avanoa taua i lenei taeao, ou te tulai atu foi ma le ava tele ma le faaaloalo. E faapena foi ona i ai le lagona e faatalofa atu i lau Afioga i le Fofoga Fetalai i lenei taeao o lele ua maitau, ia ua sootuli le Maota nei. Ua maleifua mai foi i le alofa ma le agalelei o lo tatou Tama i le lagi i faguga lelei i lenei taeao.

E manatu foi o lea ua e faatamamua ma molimoli lapalapaomalo ina ua fai ai lou fofoga ma fofoga taumolimoli o le paia o le Maota nei i ona tulaga faalupea se i sula lava le alofa ma le agalelei o le Atua e pei ona fofogaina e lau Atua.

22 IUNI 2018

**Tulafono Tau Faaofi o Teuteuga o le Tulafono o Aoga 2018  
- faitauga faalua**

E lagolago malosi lava e lenei foi itumalo le Tulafono Tau Faaofi e pei ona i ai.

E faamuliaina, e pei foi ona saunoa le Palemia, o lea lava e i ou tafatafa se tasi o pepa o lea foi e tau faatumu mo le tatou leitiofoni i le aoauli nei.

Ia manuia tele lau Afioga i le Fofoga Fetalai, faapea foi le mamalu o le Maota nei.

**FOFOGA FETALAI:** Malo faafetai. Se i faamaopopo ifo la tatou pepa lena e tau ai le tatou Palemene. Ma ou te faamalulu atu i lau Afioga i le Minisita o Aoga, Taaloga ma Aganuu, ona o lea ua tatou toai i le taimi e manava ai a tatou galuega i le Aso Faraile. Ona o le Aso Faraile lava latou e faapitoa tatou te...Pe afai e le umi le saunoaga i mea sa finagalo i ai le sui usufono, ona toe tuu atu lea o se isi lima minute.

E i ai le manatu, e a pe a tapena lelei lou sa, aua e i ai foi nisi o faauilavea i mea e faapena ona le tau i ai le finagalo o sui usufono mamalu, i sau saunoaga faamalamalama. Ae lelei ona tapena lelei lau saunoaga faamalamalama i le Aso Gafua pe a pule alofa le Atua e aulia i le lagi e mama ma le soifua manuia. Ou te faamalulu atu ai i lau Afioga i le Minisita o Aoga. Ona o lea ua tatou taunuu i siui o le Aso Faraile o le 12:00.

Ae tatou te le i tolopo, ou te tapa ma le faaaloalo lau susuga i le aoao po o le Afioga i le sui usufono mo Samatau ma Falelatai na te faaiuina la tatou Fonotaga i se tatalo.

*Na motusia Felafolafaiga ina ua tolopo Taulumaga a le Fono Aoao i le itula e 12:02 i le tutonu o le la, seia aulia le Aso Gafua, 25 Iuni 2018 i le itula e 9:00 i le taeao.*

25 IUNI 2018

**Tulafono Tau Faaofi o Teuteuga o le Tulafono o Aoga 2018  
– felafolafoaiga i luga o le faitauga faalua, faaaau mai le aso 22/6/2018**

Ia e i ai foi le agaga e faatalofa atu ma molimoli alofa atu i lenei taeao fou aua le Fonousu a Samoa e pei ona i ai lenei taeao. E manatu foi sa momoe ma manu ae sau mala e atiae, peitai, o lele ua faapena ona sootuli le Maota nei. O le aso foi ananafi sa faapena ona tatou asia ai le Maota ma faapena ona tatou ulufale ai i le malumalu o le Atua e tapuaia ia se i to ni manu, e fai lava ma sulu i o tatou vae ma malamalamama i o tatou ala, aua le agaiga foi o galuega fai ia a o se manuia foi o si o tatou atunuu i lona aotelega.

E maua foi le agaga e faatalofa ai i Faauluuluga o Matagaluega faapena foi Faalapotopotoga Tumaoti o le tatou Malo ua tatou faatasi i lenei taeao aua lo latou auanaga o lo o vae ma lima aua se manuia o le tatou atunuu.

Ua ou tulai atu ma lou agaga faaaloalo, e faaaau le tulaga e pei ona i ai le Tulafono Tau Faaofi o le Matagaluega o Aoga, e suia ai nisi o vaega foi mai le Tulafono Autu mai le 2009 i le 2018, e faapena pei ona i ai le agaga, ia e tilotilo lava ma matimati ma sailiili i lea tausaga i lea tausaga aua le agaiga ina ia faapena ona lelei ma atoatoa ia le taiala ma faiga faavae aua le agai i luma o le Matagaluega o Aoga.

E taumafai e tali atu foi i ni fesili e pei ona i ai le aso ua mavae e tusa ai ma le Fonotaga, ia o nisi o Afioga i sui usufono aemaise nisi o tamaitai sui usufono sa latou laga nisi o fesili, aemaise ai o fautuaga na tuuina mai aua le matimatiga o lenei Tulafono ina ia atoatoa lona aotelega. O le mea lea e momoli atu ai le agaga faafetai i e na latou lagaina nisi o fuafuaga.

O le a ou le taumafai e auiliili i le agaga lautele, ia po o le taitasi atu, ia a o lea o le a aofai i sona aotelega aua e pei lava e foliga mai e auga lava e tasi le tele o fesili foi na tuuina mai aemaise foi o fautuaga.

Na saunoa nisi o sui usufono e tusa ai ma le tulaga foi lea po o ua i ai se infrastructure e faapena ona taunuu i ai le taumafai a le Matagaluega ina ia maua atoa le aotelega o le Tulafono e pei ona i ai. Ia ma ou te tali atu e faapenei, ia e faapena foi ia le tilotilo a le Matagaluega, ina ia atoatoa ia tulaga ia ma agai ai i se tulaga e atagia ai, o lo o lelei ia le faafoeina o aoga i totonu o aoga.

O le tulaga e pei ona fesiligia e le tamaitai sui usufono i le mataupu foi lea o le literacy ma le numeracy, ia po o le a sona aotelega, a o le a se taumafaiga i totonu a o le a ni iuga o i ai, ma ua faapena ona molimauina ma faamauina e le Matagaluega ia le alualu i luma, le alualu i luma o a latou suesuega ma le tulaga foi o i ai a tatou tamaiti ia le tulaga lea? E pei lava foi ona silafia, e tasi lea tulaga o lo o matua mataituina lelei ia le aotelega i totonu o le tatou atunuu aua o i, ia o le ute lea o faigamea, o le vave ona lelei le faitautusi ma le numera a tamaiti, ou te iloa foi o le a faapena ona faasolosolo lelei ai lo latou taumafai a o agai i luma.

O isi vaega pei ona laga o aoga amata. Ia ma le mea lava lea e pei e faaluafesasi ai o le tausaga amata e pei ona i ai i le 5 o lea ua tuu mai i le 4. O le auga o le faamoemoe o le tulaga lea, ina ia vave ona oo ia tamaiti i le aoga, pei ona maitauina e tele lava alo ma fanau o lo o faapena ona aafia i aoga amata. O lea la ua faatulafonoina ma o le a limataitaiina ai foi galuega a le Matagaluega ia mo le agai i luma.

25 IUNI 2018

**Tulafono Tau Faaofi o Teuteuga o le Tulafono o Aoga 2018**  
 – felafolafoaiga i luga o le faitauga faalua, faaauau mai le aso 22/6/2018

O le faatinoga la o le fuafuaga lea aua i le amata i le 4 tausaga, ia e lilifa lea agai i a tatou aoga amata, ae o le primary level lava latou, ia o lo o amata sao lava i le 5 tausaga. O lona uiga e tatau ona oo atu i le 4 tausaga, ua i ai le tamaitiiti i totonu o le aoga amata e pei ona faatulafonoina. O le aoga foi o le faatulafonoina lenei, o le a limataitaiina ai foi le gasologa o galuega a le Matagaluega mo le agai i luma ina ia mataituina ia le auai o tamaiti i totonu o aoga amata. O lea foi ua outou maitau ua i ai foi nisi o saunoaga e agai po o le a le tulaga i le togiina o faiaoga i le tulaga lea. Tasi lea vaiiliu o lo o tilotilo i ai le Matagaluega atonu foi o le a faapena ona aumai ai fautuaga mo le agai i luma o le togiina o faiaoga ia e faatinoina ia aoga amata, pe a faapea ua faapena ona taunuu i sona taunuuga lelei ma atoatoa le tomai ma le agavaa o faiaoga e aoaoina ia tatou fanau. O lea ua i ai le polokalame a le NUS i le taimi lenei e faaauau le degree level o le ECE po o faiaoga e latou te aoaoina ia aoga amata, o le diploma, o lea foi e i ai a tatou council o le ECE o lo o faia i ina le certificate i le taimi lenei. Ae ua i ai lou naunautaiga, certificate, diploma, degree, o lona uiga ua atoatoa atoa ia faiaoga ma aotauina, ia e mafai ai ona latou faatinoina lea tulaga. E pei la ona i ai le miti lea a lo tatou Malo, e tatau ona oo atu i le...talosia ia vave mai aua le tulaga o tatou aoga amata.

Ae faafetai mo fautuaga ua aumai, o lo o faamauina foi ina ia faapena ona toe tilotilo i ai. E manatua foi o le Tulafono lenei, a uma ona pasi lea i le tatou Komiti e faapena ona toe iloilo ia ma ave foi i ai, ia ma faapena foi ona matala i a outou Afioga ma le atunuu ni o latou finagalo fia faaalua ae le i toe aumaia i totonu o le Maota.

O nisi o manatu e pei ona i ai le agaga foi lenei na faaalua, o le tulaga foi lea e taua ai le corporal punishment lea e noatia ai lalo o le Tulafono, e le o mafai ona faaogaina, a o lea ua faaupuina o le reasonable force, ioe o lo o faapena ona....

**FOFOGA FETALAI:** Malie le Minisita, se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia):** Lau Afioga i le Fofoga Fetalai, o le faasamoa, o le aoaoga ma le alofa.

**Afioga Hon LOAU SOLA KENETI SIO:** Ae o le technology lea e faaoga e pei o lea e tatou te feeseeseai ai, a o le auga lava o le Tulafono, ina ia puipuia ai le faiaoga ma tagata o lo o aofia ai, aua e le tasi se mea e faapena ona tulai mai ai ni faafitauli. O lea foi e agai sao lava le Tulafono lea ma le teuteuga o le Tulafono i kolisi po o aoga maualuluga, e le o aofia ai a tatou aoga ia ECE ia ma le primary level. Lona uiga e matua tapu lava i i pe tapui i ina i le tulaga lea. Ae o le auga na ala ai ona tilotilo foi le Matagaluega aemaise o le Ofisa o le Loia Sili, e tilotilo i se faiga ina ia faapena ona puipuia mai ai le o le a faapena ona oo i ai se tulaga foi lea.

25 IUNI 2018

**Tulafono Tau Faaofi o Teuteuga o le Tulafono o Aoga 2018**  
 – felafolafoaiga i luga o le faitauga faalua, faaauau mai le aso 22/6/2018

O le faaitaiga faigofie lava o le fusu o tamaiti i tai i le maketi, alu atu le faatauola la e i tai i le maketi ua leaga ai ma ana mea, ia e toso ese po o se mea faapena, reasonable force, ia po o se fusuaga foi e fai i le aoga, aua o mea lava e tutupu. Ia e alu atu le faiaoga e vavao le toalua lea e fufusu ae aafia atu ai ia pe masae ai le ofu. A o le determine ina la, ia o le mea lena e faatoa fai pe a oo i le Court, ioe, ia ona determine ai lea po o le a le mamafa o le reasonable force lea na fai, aua e i ai le reasonable force e fai si mamafa, ia o le mea lava lena. A o lo o fai foi le faalauiloa a le Matagaluega ina ia iloa e faiaoga e te tilotilo i lou lumanai ma lou aafiaga, ina ia aua ai ne i aafia oe. Ia o lau lava fautuaga na fai i faiaoga, aua le faia, a e vaai atu o....ia fai se tulaga ma ia make sure e iloa e le faiaoga, e ono aafia ia pe a oo ina faatinoia ia tulaga i se tulaga e aafia ai le tamaitiiti. O lalo i le Act a leoleo la e i ai, ia o le assault lava o le assault, ioe, pe e te iinia le tamaitiiti pe toso lona ofu, ae a molia ai oe, ia e molia lava. O lona uiga la e tele le aafiaga o le faiaoga pe a faapea e tago e faatino, a o se Tulafono e pei ona aumai, e puipuia mai ai la le tulaga lea pei ona taumafai e faamalamalama atu.

Lau Afioga i le Fofoga Fetalai, ia pau ia o nai mataupu lau Afioga sa....

**FOFOGA FETALAI:** Malie le Minisita, o lo o tulai mai le sui usufono o Faleata Sisifo.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai, pei o le mea lea, faafetai lava i le Afioga i le Minisita, pei o le mea lea sa taua o le force lea, e puipui ai nai faiaoga, ia o lea la ua tali i ai le Minisita, ae e taua leaga e feteenai ai Tulafono ona e i ai foi le Tulafono a Leoleo ia. A o le mea lea lau Afioga i le Minisita lea sa ou toe talanoa atu i lau Afioga e te tagai i ai, o le upu lea o le special needs, manaoga faapitoa. Pe aisea le mafuaaga ua toe sui ai, aua o lea ua talia uma e le lautele, o lea foi e i ai le literature ma mea uma e faaoga uma e tagata, e manatua outou le Ofisa o Aoga, o i ina e sau ai ia le tele o faaupuga e faaoga tele e tatou. O lea la ua toe aumai le upu lea disability lea e faamatala mai i le tulaga le atoatoa o le malosi o le mafaufau ma le tino. Manatua foi outou e le promoting ina le Inclusive Education, e tutusa uma tagata uma e le faailoga tagata, ae o lea la ua outou taua mai, o le tagata e le atoatoa le malosi o le tino, toe le atoatoa ma le malosi o le mafaufau. E pei ua toe degrading ua toe aumai lea upu lea **ae tatau ona lau Afioga, o lea na manaia ma matagofie le upu lea pe taatia ai** pea, special needs, manaoga faapitoa, e le gata ina manaia le faaleoga, talafeagai, toe lelei.

Ia ma le isi mea lau Afioga o lea e tau e taua, o aoga a le Malo o lea ua outou suia mai, aveese Aoga a Nuu ae tuu i ai Aoga a le Malo, manatua foi le partnership lea na taumafai e outou, ia ave le ownership i tagata lautele i tua, o aoga a nuu ma itumalo. O lea lava tatou te iloa lava o aoga a le Malo, ae pei o se faaupuga foi lea e i ai se responsibility i tagatanuu, o latou e owning le aoga, le Aoga a Vaitele Primary School, vaai le manaia. Ae taatia ai i ina ma le toe fesui mai le tele ai fua o le.....ma le faaaloalo lava.

25 IUNI 2018

**Tulafono Tau Faaofi o Teuteuga o le Tulafono o Aoga 2018**  
**– felafolafoga i luga o le faitauga faalua, faaaau mai le aso 22/6/2018**

**FOFOGA FETALAI:** Malo, lea ua maua, tulai mai lau Afioga i le Minisita.

**Afioga Hon LOAU SOLA KENETI SIO:** Ia faafetai, e moni ia si ou uso a usufono, e tusa ai ma le.....ia ua pau ia te au le disability. Ia o le special needs, disability e tasi ia o faaupuga o lo o faapena ona faalauaitele i totonu o le UN Convention lea ua i ai. E le gata la o faalapopotoga mai fafo, ae o lea foi ua faaoga faalauaitele e nisi o Matagaluega o le tatou Malo e tai pei o le Matagaluega o Tina ma Tamaitai, o le latou foi lea Tulafono o lo o aumai ai le Disability. E pei la o le agaga foi lea o le ogatasi, o le ogatasi ma faaupuga o faapena ona faaogaina mai e isi. Ae sao ia le sui usufono, e pei e foliga mai ia ae e pei foi ona ou fai atu, o lea e uma ona ave lea o le Tulafono i le Komiti ia, e toe tilotilo foi i ai ma toe vaai pe talafeagai ona tatou faaogaina, o lona uiga a tatou le faaogaina ae faaoga pea ia le special needs, o lona uiga la ua ese mai tatou mai faigamalo tetele ia ma isi tulaga faapena. Ia ae pei o le agaga lea, ae o le a faapena foi ona toe autilo, ae pei o le fautuaga lena na aumai e le Matagaluega, ia ona o le tulaga o lo o faaoga lautele i le taimi lenei i le lalolagi le upu lea o le disability.

Ia pau lea lau Afioga i le Fofoga Fetalai, o le suiga o le Aoga a le Malo i le Aoga.....o mea lava e fai ae e leai lava se eseese tele. Aoga a le Malo ua taaofai, ioe leaga o le tatou Malo lea e faatupea uma ia le tele o le tulaga e pei ona i ai. Ia e pei o le agaga lea lau Afioga i le Fofoga Fetalai. Ae faafetai lava mo sui usufono na latou laga ia le tulaga foi ia ma faapena ona matimati ai le Tulafono Tau Faaofi a le Matagaluega, ia ae faafetai tele mo lou avanoa.

O lea ou te vaai atu o lea e tau tulai mai ia le sui usufono lea, ae le i lauga i le Tulafono Tau Faaofi lau Afioga i le Fofoga Fetalai. O le mea la lea, ia manuia tele lenei taeao.

**FOFOGA FETALAI:** Ia malo, faafetai.

*Na faamaonia le lafo ma faitauina le Tulafono Tau Faaofi o Aoga 2018 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi i le Komiti o le Vaega Tau le Va Fealoai mo le iloiloina ma toe lipoti mai i le Fono Aoao i le fonotaga e sosoo ai nei.

**TULAFONO TAU FAAOFI O TEUTEUGA O LE TULAFONO O FUA**  
**FAATATAU O LAFOGA O OLOA E GAOSIA I LE ATUNUU 2018**  
**– faitauga faalua**

**FOFOGA FETALAI:** Talu ai ua tulimaina le Tusi Faamaonia o le Tulaga Faanatinati, o lea o le a sagai atu loa le Fono Aoao mo le faitauga faalua.

Ou te tapa ma le faaaloalo lau Afioga i le Minisita mo Tupe Maua.

25 IUNI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – faitauga faalua**

**Afioga Hon TIALAVEA FEA LENIU TIONISIO HUNT (Minisita mo Tupe Maua):** Faafetai i lau Afioga i le Fofoga Fetalai, aemaise foi o le afio o le Afioga i le Palemia ma le Kapeneta, Minisita Lagolago ma lena itu o le Maota i Afioga i sui usufono, aemaise foi ia Faauluuluga o Matagaluega a le Malo, ua tatou faatasi i lenei taeao.

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 i lona faitauga faalua ma ou te tautala faamalamalama i ai.*

**FOFOGA FETALAI:** Malo faafetai.

*Faaluaina e le Minisita mo Tina ma Tamaitai, Atinae o Nuu, Afioga ma Agafesootai, le Minisita mo Faatoaga, Vaomatua ma Faigafaiva ma le Minisita mo Galuega, Felauaiga ma Atinae Esesese.*

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, o le Tulafono lea o le Tulafono o le Ttapaa po o le sikaleti, sa pasia i le tausaga talu ai 2017 i le taimi o le budget, sa pasia ai e 3 tausaga e siisii ai le tapaa i le 5% i tausaga taitasi.

Ua uma la ona siitia i le tausaga ua tuanai, ae o lea la ua amata i le tausaga nei 2018 ia Iulai ona toe sii lesi 5% ia ma toe sii ai le isi 5% i le tausaga fou 2019. E pei o le auga lena o le Tulafono lau Afioga i le Fofoga Fetalai, o le faatinoina o le Tulafono na pasiaina i le tausaga ua tuanai. A o lea la ua aumai e faatulafonoina ai le siitaga lea mo le tausaga nei, e amata ia Iulai ia ma le tausaga fou pe a aulia atu i ai lau Afioga i le Fofoga Fetalai.

Na pau lena o le faamalamalamaga lau Afioga.

**FOFOGA FETALAI:** Malo faafetai. Atonu o lea ua malamalama le folasaga e uiga i le teuteuga o lenei Tulafono.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 i lona faitauga faalua.*

**TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA E GAOSIA I LE ATUNUU 2018 – iloiloga auiliili**

**FOFOGA FETALAI:** E tusa ai ma le Tulafono Tumau, e amata le iloiloga auiliili i le Fuaiupu 2.

**FUAIUPU 2:** Teuteuga i le Faamatalaga

*Faamaonia.*

25 IUNI 2018

**Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 – iloiloga auiliili**

**FUAIUPU 3:** Teuteuga faatupulaia.

*Faamaonia.*

**FUAIUPU 1 MA LE IGOA:**

**FUAIUPU 1:** Igoa puupuu ma le amataga.

**IGOA:** Teuteuga o le Tulafono o Fua Faatatau o Lafoga o Oloa e Gaosia i le Atunuu 2018.

*Faamaonia.*

*Na faagasolo le Tulafono le Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2018 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O FUA FAATATAU O LAFOGA O OLOA E GAOSIA I LE ATUNUU 2018 – faitauga faatolu**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fua Faatatau o Oloa e Gaosia i le Atunuu 2018 i lona faitauga faatolu.*

*Faaluaina e le Minisita mo Faatoaga, Faigafaiva ma le Vaomatua, Minisita mo Galuega, Felauaiga ma Atinae Eese ma le Minisita mo Tina ma Tamaitai, Atinae o Nuu, Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O LAFOGA O TUPE MAUA 2018 – faitauga faalua**

**FOFOGA FETALAI:** Talu ai ua taulimaina le Tusi Faamaonia o le Tulaga Faanatinati, o le a sagai atu loa le Fono Aoao mo le faitauga faalua.

Ou te tapa lau Afioga i le Minisita mo Tupe Maua.



25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2018 i lona faitauga faalua ma ou te fia tautala faamalamalama i ai.*

*Faalua e le Minisita mo Faatoaga, Faigafaiva ma Vaomatua ma le Minisita mo Tina ma Tamaitai, Atinae o Nuu, Afioga ma Agafesootai.*

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai mo le avanoa, o le Tulafono leni e lua ni vaega o lo o taumafai e teuteu.

O le teuteuga muamua lau Afioga ina ia mafai ai ona agavaa ia le aufaipisinisi ia mafai ona fai ia ni latou donation mo le tatou taaloga foi lea o le South Pacific Games, lea o le a fai i le tausaga fou. O le Tulafono la lea e ave ai le avanoa o le 200% o le latou foai, e ave i le Komiti lea o Taaloga o le South Pacific Games, e toesea mai i a latou lafoga.

O le agaga o le Tulafono ina ia faafaigofie le galuega o le suega seleni e ala i le Komiti lea o le Taaloga a le Pasefika, ina ia mafai ai ona agavaa ma maua se tupe e faatino ai le galuega. E amata mai le fesoasoani lea i le \$5,000 agai i luga, e le mafai ona i lalo ifo, e le mafai foi e se tagata taitoatasi ona agavaa i le lafoga lea, i le faamanuiaga lea. O le faamanuiaga e faasinotonu lava mo le aufaipisinisi ma a latou fesoasoani e ave i le Komiti lea aua le fuafuaina o le Taaloga o le Pasefika i le tausaga lea, a ave lau \$100,000 o lona uiga e toese mai ia lau \$200,000 i tupe maua ae le i tipia le lafoga lau Afioga i le Fofoga Fetalai.

O le vaega e lua lau Afioga i le Tulafono Tau Faaofi leni ia e faasino lea i faafeagaiga. O le agaga o le Tulafono o lafoga, ia toe teuteu ia na o tupe maua masani a faifeau e aofia i le lafoga. E faapei foi o isi tagata totogi lafoga. O lona uiga e na o tupe maua masani o alofa e ao i le vaiaso po o le tai lua vaiaso, ae le taulia ai isi fesoasoani, faamanuiaga mai e pei o maliu, faaiipoipoga, ma saofai, aua e le o ni faamanuiaga e tupu soo i vaiaso uma. E seasea ona maliu se tasi, pe fia i le tausaga faatoa fai se faaiipoipoga. O mea ia e le o ni faamanuiaga masani. O le upu e faataua, o faamanuiaga masani lau Afioga.

E faapei ona faaalua pea e le Taitai o le Malo i ana polokalame o le talanoaga i le 2AP, o le uiga foi o le faatalanoaina ma le maliega Kapeneta, peitai o aiaiga o le faaupuga o le Tulafono o i ai nei, e pei ona tusia ai e le au tusi Tulafono, e fai si ona lautele o le Tulafono lau Afioga. E mafai lava ona falo falo lava e le au aolafoga, lavea ane ai ma mea nei e le o ni mea e mafai ona maua i aso uma. O lona uiga, o le au ao lafoga lava ia e mataalia, sogasoga, maelega, maemae, e falo falo lava le Tulafono o lo o i ai i le taimi leni, te i ua oo i ai i faamanuiaga e le o ni faamanuiaga masani.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

O lea e atagia i le faaupuga o le Tulafono, tiga lava ona faalogo, faalogo pea i fuafuaga mamao a le Malo, e pei ona saunoa soo i ai ia le Palemia, a o le i tusia le Tulafono ua faafofoga foi i ai le lautele, i le mau faamalamalamaga i le 2AP, ae peitai, sa faaoga solo lava ia le Tulafono, e pei ona toe teuteuina ai nei.

O le faamaninoga lea o le Tulafono Toe Teuteu, ina ia le mafai le mafai ona faafaigofie ona lavevea ai fua nisi faamanuiaga e le masani ai, e pei foi ona i ai nei tagata faigaluega i totonu o le Malo ma kamupani, na o tupe maua lava i le vaiaso e maua ai le tai lua vaiaso e aofia i le galueaiina o le lafoga e tatau ona totogi.

O le faamalamalamaga lena lau Afioga i le Tulafono, o le faamaninoga lava o le mea e ao ona totogi le lafoga, na o tupe maua masani i le lua vaiaso pe vaiaso a faafeagaiga. Ia o le faamalamalamaga puupuu lena, a o le Tulafono lava ia ua uma ona pasia. Faafetai i lau Afioga.

**FOFOGA FETALAI:** Malo faafetai. Ia, afai ua manino le faamalamalamaga a le Afioga i le Minisita, o le a tuuina atu loa ma le fesili.

Se i tulai mai le sui usufono mo Alataua Sisifo.

**Afioga ALIIMALEMANU ALOFA TUUAU (Alataua Sisifo):** Faafetai mo le avanoa. E faafeiloai atu foi i lau Afioga i le Fofoga Fetalai faapea sui usufono o le Palemene ae le gata i lea o Faauluuluga o Matagaluega ua tatou faatasi i lenei taeao. Ae na o se manatu ona o lea e patino lava le Tulafono na o faifeau, ae pei o se agaga lea e tau avatu po o le a le mea e le tuusaunoa ai foi lea e aiaia ai faapea o meaalofo tau tupe e mauaina i taimi o maliu, ona e aafia ai foi tatou, e aafia ai O Le Ao o le Malo. E toatele e aafia ai, a o lea o le a faamaoti na o faifeau e exempt mai i mea ia, aua e uma ae ona fesili foi lea pe faapefea tatou sui a usufono, pe faapefea nisi o Faauluuluga o le Malo o lo o ave i ai ia faaaloaloga ia?

E pei na o se manatu vaivai lena, o lea o le a faapatino na o faifeau ae le faalautele i tagata lautele. Faafetai mo le avanoa.

**FOFOGA FETALAI:** Malo faafetai. Ia, ou te tapa le sui usufono mo Salega.

Tulai mai le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, faafetai mo le sui usufono na faaalua le manatu. O le Tulafono Tau Faaofi e aafia uma ai lava so o se tagata faigaluega o lo o maua a latou tupe masani lea e aafia ai foi la i le faamalamalamaga lea o isi teutusi ia e maua solo mai lau Afioga.

**FOFOGA FETALAI:** Malo faafetai. Ia, se i tulai mai lau Afioga i le Palemia.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le taua lea o le faamalamalama a le Minisita. O le tulaga lava ia na o tupe maua masani. O lea tatou te iloa e oo foi ia tatou, na o tupe masani lava e maua i o tatou totogi. E faapena uma lava, a o lena ua faamanino mai foi e le Minisita, o le faaupuga o le Tulafono Tau Faaofi ia, e fai lava si lautele. E pei la ona ia faamalamalama atu, e pei o le tasi lena mea ua falo falo lava finauga o lo o fai nei, te i lava ua lavea ai fua mea na. E le o aofia lava i le tulaga o le Tulafono Tau Faaofi. E pei o le mafuaaga lena o lea e agai i ai aua e leai lava se isi o laga na mea, e pei faatoa mapuna ae nei e tau fai ai se manatu foi lele e teena ai lafoga a faafeagaiga. E pei la o le auala o le mea lea, ia faamanino faaupuga ia manino ai le mea lena i le aumai fua o na mea e le o aofia ai lava i totonu. O lena foi e silafia a fai lava le usu ia e leai nisi o alu atu e tapa le tulaga o lafo o toeaia i tua. Ia o ai ana faia lena galuega i le tele o le mau tagamea ma mea tau fufulu? A o le tulaga lava ia o tatou tu ma aganuu, o mea lava na e masani ai tatou, e le tataua ona oo i ai le Tulafono na o le tele o le gasu le mea e tulai mai ai ma tigaina ai fua le ao lafoga, ae o ane pea latou e fai mea faigofie ma mea masani ai.

**FOFOGA FETALAI:** Malo faafetai. Ia, atonu ua manino le folasaga e pei ona tulai mai.

Se i tulai mai sui usufono e fia saunoa i le mataupu lenei? Ia se i tuu atu la i le sui usufono Tamaitai mo Gagaifomauga Nu.3.

Tulai mai lau Afioga i le sui usufono mo Gagaifomauga Nu.3.

**Afioga FAAULUSAU ROSA DUFFY-STOWERS (Gagaifomauga Nu.3):** Faafetai i lau Afioga i le Fofoga Fetalai mo lou avanoa.

E faamalo atu foi i le tatou Palemene i lenei taeao fou. I le tusa ai o le Tulafono Tau Faaofi o lo o ua i lumamea nei, e i ai se lagona e fia faaali atu i lau Afioga i le Minisita, o le teuteuga lea (Nu.1) i le 200% foi lea. O le manaia ia o le faaosofiaga lea ina ia mafai ai ona faatosina mai kamupani mo se fesoasoani mo taaloga. Ae le pei ua tele foi lena 200%, ae a fa ae tuu foi lea pe na o sina... faa-line ma term deposits foi ia lea e fai i faletupe a fix le term deposit, po o le a le pasene e i ai o le pasene lena e apply. A maualuga fou, ia po o se 20% pe 120% se mea e faamatuu i ai ona return mai lea o le 20%. O lou atugaluga lea e i ai, ona o le tele ia o le target lena e faataatia i totonu o le Budget mo le Matagaluega o Tupe Maua, ae ne i te i ua toe afaina ai le paketi i le tausaga fou i lona faaiiuga, talu ai o le teuteuga o le Tulafono Tau Faaofi lea.

Ona oo mai ai lea o se manatu i le Teuteuga lona lua, o le manaia ia o le faatulagaga lena ua i ai mo faifeau. A o se manatu po o se vaivaiga, e le i mafai aua o lea e mafai lava ona identify alii faifeau.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

Ae pe mafai ona toe faatulaga foi lea e fai latou tax return pe faatumu lea o latou... pei o le mea lea sa fai i aso ia, ona allow ai lea o se aofaiga o fuainumera o donations e mafai ona exempt, ina ia mafai ai lea aua o i ina e atagia mai ai i ina se se aluga foi lea e siitia mai lea taimi i lea taimi aua o lea e alualu lava i luma le soifuaga, ma alualu ai lava i luga ma donation foi nei o tagata, ona mafai ai lea ona identify ia... aua o la e o le a patino lava na o alii faifeau.

Ia o se faamatalaga lea ma lou ava ma lou migao e tatau ai. Faafetai lava mo lou avanoa.

**FOFOGA FETALAI:** Malo faafetai. Se i tulai mai le sui usufono mo Vaimauga Sasae. Malie le sui usufono mo Vaimauga, se i tulai mai le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, na o se fesoasoani atu lava i le mataupu lea e fai si lavelave. O le Tulafono Tau Faaofi ia na o le faamanino o mea ia e tele ai faamatalaga foi nei e faavae i luga o le pogisa ma le le malamalama, a o le tulaga lava ia, e le tau faia ni mea faapea. Ae ala ona fai mea ia, ina ia maoti lelei ai e tau faamalamalama ai ia i latou e faapea o faia ni faamatalaga e faaleaga ai fua le Tulafono ia, a o lo o manino lava o mea ia e le masani ai, na o mea lava o alofa po o tau i aua e fiu lava... po o le a lava le faaupuga, o tau i lava o galuega. Aua e le faia loa le galuega a le faifeau leai foi ma ni ona alofa e maua. O tau i uma lava la, aua e tasi lava le mea e faaupu ai le Tulafono o mea o tupe maua. A o le tulaga lea e aumai, e taua tele le saunoaga lea e aumai i le toe tilotilo o le Matagaluega i mea sa sau ai i aso ua tuanai. Sa masani lava ona avane lau lafoga faatumu le pepa ona aumai lea o nai mea ia e fesoasoani i lau lafoga. Ia a toese toese ua ova lau lafoga ona toe maua mai lea o le seleni e faafoi mai ia te oe. Na ala ona sui le mea lea, o le fautuaga foi a latou sa i ai e faauluulu i le Ofisa o Lafoga, o le mea lea e oo i ai le lalolagi ona o le tulaga foi lea e laitiiti ai le galuega e fai ma le toatele o tagata e fiu lava e faatali mai e le faatumua lava ni latou pepa e iloa ai le lafoga ua ova ma le lafoga e toe faafoi mai. E pei la o mea ia aua sa masani ona fai fonotaga a faauluuluga lava o mea tau lafoga i totonu o le Commonwealth ia, ma talanoa ai i auala eseese e faafaigofie ai ona fai le galuega a i latou o le au ao lafoga. E pei la o le mea lea sa taunuu i ai, e tatau ona toe tilotilo i le itu foi lea a assess lava lau income, afai lava o lau income lea, e tumau ai lava e faavae ai lau lafoga. Ia a o lea ua aumai le fautuaga, o le galuega, o lona uiga o le galuega lena e toe fai ae taua, pei e lelei ona lafo mai pea o lea ua toe laga e toe tilotilo pea i ai le Ofisa pe le tatau ona tatou toe foi i le mea sa masani ai. Aua o le mea sa masani ai, o tagata uma lava e faatumu a latou pepa. E le faatumua loa le pepa ona faasala lea o oe.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

Afai lava la e lua, aua o le mea e i ai nei afai e 24,000 le aofai o tagata lea e faigaluega, o lona uiga e 24,000 foi tagata e tataua ona... a faaopoopo loa la i ai ma faifeau pe 500 ea, ia ua lata loa i le 30,000 tagata e faatumu a latou pepa, o se galuega ma le faafafa. Ia o le mea lena, aemaise lava la pe a e nofo nei fai lau mataupu ae maua ifo e toe totogi lau lafoga nai lo mea lea o le toe maua mai, toe faaola mai.

E pei la o le tulaga lena o lea na sau ai ao lafoga uma lava, e lelei ona alu i le faiga lea, nap au lava le mea o le fia iloa po o le a lau tupe masani e masani ona maua ona faavae ai lea o lafoga e totogi. E le afaina la ia i latou foi ia o le vaega o lea e faigaluega i totonu o fale faigaluega ma le Malo aua e le tau assess ina o la e iloa lava ma fai e le aufai totogi a latou pepa ma iloa ai le totogi aofai i le tausaga atoa.

Ae pei o itu na e tele lava le mau lavelave e i ai, ae ia te au lava ia, out e talia le fautuaga. Lafo mai le fautuaga se i toe tilotilo i ai le Matagaluega, se i toe tilotilo i ai pe le tataua ona toe foi tatou i tua ona maua ai lea o le avanoa lea, aua o le isi lea mea o la e fai mai ai isi faifeau, se manaia lava pe a toe fai le mea lea. Ia ona totogi ai lea o le lafoga oo ane i le faaiuga o le tausaga vaai ane pe le i ova si au mea ae toe faafoi mai sina isi mea. Ae o mea faapena, o mea lava e mafai ona fai.

**FOFOGA FETALAI:** Malo faafetai. Ia se i tulai mai le sui usufono mo Vaimauga Sasae.

**Afioga SULAMANAIA FETAIAI TAUILILI TUIVASA (Vaimauga Sasae):** Faafetai i lau Afioga i le Fofoga Fetalai mo le avanoa. Ae le i faia foi se sao o leni itumalo, e faatalofa atu foi leni itumalo i lena foi itu o le Maota i le afio o lau Afioga i le Palemia ma le Kapeneta aemaise foi o sui usufono uma o le Maota o Samoa. E faatalofa atu foi i lau Afioga i le Fofoga Fetalai mo le taitaiga o le Fonousu a le atunuu. Ia o leni ua tatou aulia leni vaiaso fou, faafoi ai le viiga i le Atua ona o lo o tatou galulue pea aua se manuia o Samoa ma ona tagata.

Ia, o le tulaga i le Tulafono Tau Faaofi, e momoli le faafetai ma le faamalo i lau Afioga i le Minisita mo Tupe Maua aemaise foi o le Minisita Lagolago ona o le mataala foi e tuuina mai i totonu le Tulafono Tau Faaofi aua le matimatiina foi o le tatou sa.

O le Matagaluega leni pei ona taua foi e nisi o sui usufono, masalo po o le 90% o tupe maua o lo o aoina e leni Matagaluega. Faafetai ai i le Afioga i le Ofisa Sili o Pulega ma le Matagaluega i le galulue foi o lo o i ai, ae o se manatu o leni itumalo i leni Tulafono Tau Faaofi, o le 200% pei ona faaalua e nisi o sui usufono, po o le a se finagalo o le Minisita pei ua tele ae a pe a 150% ona o lou popolega pei o lea maitau ai foi nisi o kamupani o lo o i ai aitalafu i le Matagaluega, e pei o le isi lena alofaga o le a taumafai lava e sue le \$100,000 e pay in full ai aitalafu o lo o i ai, ae o la e ua credit ai le isi \$10,000. E pei o le tulaga lena e tau vaai foi i ai.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

O le 200 pei ua tele tele, ae a pe a 150, aua o la e ua toe cover a lana tupe lea na donate ai ma ave i le South Pacific Games lea ua credit ai i luga o le Matagaluega, a o lea foi ua i ai ma se ponesi lena e 50. E pei la e faapena se vaai a lou sui usufono.

Faafetai foi o le tulaga lea ua faatino ai ua le alu o se tax credit pei o le tulaga lea e fai ai tatou faletalimalo, a ua alu o se tax deduction. E matua lagolagoina foi e lou sui usufono, aveese mai lea donation i ana tupe maua, ana expenses. Ou te lagolagoina ai le vaega lea.

Ae pau lava le tatalo pei o lea ua saunoa le Minisita i le \$5,000 e pei o le agaga sa tau aveatu ai se manatu o lenei... na ona tatalo atu ona o se faatosina foi lea i kamupani ma pisinisi e omai e aumai ni sponsors ae i ai ni faamanuiaga mai le Matagaluega e toe tau ai latou donation ia. A o le tatalo a lou sui usufono, ae a pe a include ai ma tagata faigaluega, tatou nei sui usufono, o e uma lava e maua tupe maua, ona o lea e pei e tuu i luga i le 200% ona o le naunau ia faatosina ma o e invest, ae a tuu i le mamalu o le atunuu, ua tele tele foi lea \$5,000. Mo se faaitaiga, o sui usufono. E \$200 e te alu e donate ai i le South Pacific Games ae aveese mai i tatou tax o tatou tofogi fortnight lea e i ai, ua manaia tele lea. Aua e pei o lea ua faatosina i pisinisi, ona penefiti lava lea o nai pisinisi, e moni o lea, ae o lea tatou te faamoemoe i nai pisinisi, e pei ona maua foi i le Tala o le Tupe Autu, o lea ua 90% o lea ua toe faaopoopo. Ae o le a avea foi lena ma tulaga o le a le au ai le target. Ae ou te faafetai lava i le Minisita ona o le mataala e le gata o tupe maua, ae o le fesoasoani foi i tulaga tau...e pei e avatu se manatu faapena. O le a le mea e le include ai ma tatou uma lava o tagata, o ai lava e fai lana saoga pe \$100, aveese mai i lau tax la e i luga o le Matagaluega? Aua o lea e pei i lilifa i nai tagata faipisinisi ma e, ae le pei e vaai maualalo foi ia i tatou. Ae a faapea lava e avatu lau \$100, ia e \$200 lau lafoga e aveese pe a sau lou tofogi. O le tulaga lea o le faatinoina o le....o lea ua vave le taimi, ae e pei o le tatalo lena a le sui usufono, ua tele lea 200%, ae a pe a faatuutiitia i le 150%. Ou te tuuina atu ai ma le atunuu, e pei lava o le uokafoni lea e fai, o le a le mea e maua, o e tauaao, a o lea e i ai le tau mai luga o le Matagaluega.

O lona lua o le tax lea a faifeau. E momoli lava lau faafetai ma lau faamalo, ua toe i ai se finagalo o lau Afioga i le Minisita ma le Minisita Lagolago ma le Matagaluega e toe aveese ia teutusi ia ma faamanuiaga lea sa tuu i nai faifeau, o le matua ou lagolagoina lava. Ona o le tulaga sa i ai la tatou soalaupulega ma lenei Tulafono sa tuuina mai i totonu, e le i lava le faamalamalamaina ma le soalaupulega sa tuuina mai i totonu o le Palemene lenei. Samoa o lea lava sa faafofoga le atunuu, sa tuuina mai e pei e lilifa lava i lafoga ia e maua e nai faifeau i le lua vaiaso. Ae aumai ua pasia le Tulafono, ia ua sau ai loa i totonu ua faaopoopo le all income e receive e le faifeau. O lea ou te faafetai lava au i le Atua, o lea ua toe tafa i lou finagalo ma ua toe faasao le mea sese lea sa i ai i le amataga. Aua a na le avea i totonu le tulaga lea i teutusi ia, semanu e le tele foi ni faitioga a le atunuu.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

Ae ou te faafetai i lau Afioga o lea lava ua toe aveese faamanuiaga ia i faifeau ma tulaga faapena, ae ua alu lava na o le tax a faifeau. E pei o le lagona lena o le faafetai a lenei sui usufono, e lagolagoina ai le Tulafono ua faatu mai nei e lau Afioga, ona o lea ua toe lilifa lau Afioga e aveese le tulaga lea i faifeau, ua talia faatasi ai ma le Tulafono o le tax credit lea ua tuu ae o lea ua tax to tax sum, e matuai lagolagoina ma lou agaga faaaloalo, faafetai.

**FOFOGA FETALAI:** Tulai mai le sui usufono mo Salega Sasae.

**Tofa OLO FITI AFOA VAAI (Salega Sasae):** Faafetai i lau Afioga i le Fofoga Fetalai, e le umi foi se manatu e faaalua o lenei itumalo i le teuteuga o le Tulafono e pei ona faatulai mai.

Lau Afioga i le Fofoga Fetalai, ou te tulai lava ma le faaaloalo tele, e avatu lava nai vaega ia e fesoasoani atu ai i le teuteuga o le Tulafono. Ou te iloa a manatua e lau Afioga le talanoaina o le Tulafono Autu lea e faavae ai le teuteuga lenei. E lua lava ia tulaga sa avatu ai sa matou tala ma sa matou tuualalo. O le tulaga muamua lava sa matou talosagaina le tulaga, e a pe a ni lafoga i faiga taulaga a ekalesia, ia ae faataatia faafeagaiga. Ae ui i lea, o lea ua see lou sa lau Afioga i le Minisita, i le tulaga i le faatinoina o le faiga o lafoga a faifeau.

O le lona lua o lau tuualalo lea na avatu i lena foi taimi, o le aveese mai o lafoga o meaalofa o teutusi, sa ou tatalo atu lava i le taimi lena. Ae ua faafetai ua e amanaia se tuualalo a lenei itumalo. O lea ua i ai le tofa a lau Afioga ma le Matagaluega foi ma lo tatou Malo, e fai lena vaega.

O lona lua lau Afioga i le Fofoga Fetalai i le 200% lea o le lafoga o le....po o le tax credit foi. E au se manatu o lenei itumalo i le finagalo fofi sa faaalua e se tasi o sui usufono mo Vaimauga Sasae. Ua tele tele le 200%. E 150% lea na ou faalogo atu i ai o saunoa i ai le Afioga i le sui usufono mamalu, ae 120% le itumalo lenei.

E mafua se faamatalaga lau Afioga i le Fofoga Fetalai, ona o se tamai taimi lava lea e faatino ai le Tulafono lea pe a sao lau vaavaai atu, o lea e fuafua i le taaloga a le Pasefika o le a faia mai iinei i lo tatou atunuu. Ia sina tamai taimi lava, ae a faapea e 200% le tax credit lea. O lona uiga a aumai le miliona a kamupani tetele lea e i ai le Bluesky ma le Digicel, o lona uiga a claim le 200% lea, ua lua miliona. A o si tamai taimi lava lea e faatino ai le faiga o **fesoasoani lea mo a latou tupe mo le taaloga.**

A o le isi foi la au fesili lau Afioga. Po o le mea o lea faatoa sue tupe e fai ai a tatou taaloga? Ae o lea e pei e toe fia ea, e le toe ato se lua tausaga po o se tausaga, ae faatino le tulaga o...ae pei faatoa tau sue a tatou tupe. E popole lava i le tulaga lea o le lē lava tapena foi o tatou i le faatinoina o lenei atinae.

E faauma atu se faamatalaga a lenei itumalo lau Afioga i le Fofoga Fetalai, na o ni mea foi e tomatauina ai le Afioga i le Minisita ma le la latou Matagaluega, i se aoaoga foi a Iesu i lana Tusi Paia, i le Roma e 13 f7.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

E manaia pe a ou faitau faa-Peretania e malamalama lelei ai. Ina ua oo atu ia le au ao lafoga foi ia, a o fai aoaoga a Iesu, e o atu e aumai tax a tagata sa faalogologo ia Iesu ma lana aoaoga. Ua tetee tagata ma fai mai e leai. O le tali lea a Iesu na fai i ai, “Give everyone what you owe him, if you owe taxes then pay taxes,” e faatusa la i le aufaigaluega lea sa i totonu o le aoaoga a Iesu. If revenue then revenue, fua i kamupani, o tama foi ia sa fai a latou faatoaga saito ma mea faapena. If respect then respect, o le uiga o le tala a Iesu, ia respect i le ekalesia. Ae mulimuli mai loa ma le upu a Iesu, if honor then honor, e ave lena i i taitai o faigamalo.

E fa vaega na vaevae i ai e Iesu ituaiga tagata ma o latou faasinomaga. E le tax uma ia ni tagata. E le avea foi le honor i tagata uma, e le respect foi i tagata uma. Ia o aoaoga na a Iesu. O le ala foi lena na tali ai Paulo i le Galuega e 5 f 29, ina ua toe o atu foi le faauluuluga o le Matagaluega o Tupe Maua, sui usufono mo Vaimauga Sisifo Nu. I ma le Minisita o Tupe Maua, e toe ao mai foi lafoga i ina, o le tali lea a Paulo na fai i ai. E ao ona tatou usiuitai i le Atua i lo o le tagata. O le faapalagi lea e i ai. We must obey God rather than men. O le men lea e i ai e faatusa lelei lava i le authority po o le Government.

Ia o se upu lena i lau Afioga ma le Matagaluega. Faamalo lava le galulue. E te onosai, e lelei lava le tale tasi, ae a tolu loa au tale tale, ona e faatoese loa lea i le Atua ae aua e te alu i le falemai. Ma le agaga faaaloalo, faafetai.

**FOFOGA FETALAI:** Tulai mai le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai, atonu e tatau foi ona fai sina malologa a nisi o sui usufono e le i saunoa i le teuteuga o le Tulafono.

Faafetai i le sui usufono ua maea atu nei i le folasia mai o le Tusi Paia. I le taimi na ou mafaufau ai e fai le Tulafono lenei, e tasi lava le manatu autu, tofu sao tagata uma o le atunuu i le atinaeina o le atunuu, ou te le i faaogaina le Tusi Paia.

O le 200% lea, i te i foi ua toe laga mai e nisi, sa faaoga foi i le 2007 i le taaloga o le South Pacific Games i le 2007, e 200% sa ave ai foi, e faatosina mai ai kamupani, ia faigofie ona maua le.....aua a le maua vaegatupe lea e fesoasoani mai ai kamupani, o ai e fall i ai le South Pacific Games? E fall mai i le Malo e faatupeina. A o le avanoa lenei ua avatu e fai mai ai le fesoasoani a kamupani nei, ina ia mafai e le Malo ona tauave le taaloga aua e fall mai lava i le Malo e suetupe, e faatino ai le galuega, toe fall mai ai lea i le matou Matagaluega. Ae e pei o le auala lea e faigofie ai le galuega a e o lo o vaai le faagasologa o le taaloga. O lea ua outou tagai i ai e \$11miliona lea ua alu atu i le amataga i le faagaoioiga o taaloga nei o le South Pacific Games. Ua matua manaomia le fesoasoani a le aufaipisinisi mo le komiti a le South Pacific Game. E pei o le isi vala lena lau Afioga, te i foi ua toe laga mai e se isi le 200%.



25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

E faamalulu atu, o le faatosina ina ia mafai ona foai mai tupe a le aufaipisinisi. O matou au lafoga matou te faaeteete foi ona o le faaletonu, ae a vaai i le aotelega o le mafuaaga na faatino ai, o le fesoasoani mai i la matou Matagaluega, aua o matou lava e toe suea tupe e ave e faaoga i le South Pacific Games. Mo le taimi lenei, e puupuu le taimi lea tatou te galulue ai, at least o lea e i ai le tausaga e tasi o lo o totoe, e fai lea e ave i le komiti o Taaloga o le Pasefika i Saute, ina ia mafai ai ona maua mai le seleni, le \$40miliona lea na aumai i le Tala Faatatau o Taaloga o le South Pacific Games, i le latou budget, e na o le budget. O lea ua ave i ai le \$11miliona, talosia ia gafatia e kamupani ia fesoasoani mai i le suega seleni a le komiti. Faafetai i lau Afioga.

**FOFOGA FETALAI:** Malo, atonu o lea ua...Tulai mai le sui usufono mo Itumalo Tu Taulaga Sisifo.

**Afioga FAUMUINA ASI PAULI WAYNE FONG (Itumalo Tu Taulaga Sisifo):** Faafetai i lau Afioga i le Fofoga Fetalai, faatalofa atu foi i lau Afioga i lenei taeao fou, aemaise foi le Palemia ma le mamalu o le Kapeneta. E le tele lava se manatu. O le mea taua e momoli atu le faafetai tele i lau Afioga e ala atu i le Afioga i le Minisita o Tupe Maua, i le amanaia foi o kamupani i le tulaga o le luaselau pasene mo tax deduction aua foi le fesoasoani atu i Taaloga a le Pasefika.

E i ai taimi e alu alu lava e manaomia lava e le Malo se fesoasoani mai i le atunuu, aemaise foi o kamupani taitoatasi. Ia ae taumafai e faaauau pea se polokalame mo kamupani nei taitoatasi, ina ia mafai ai ona omai pea e fesoasoani i galuega a le Malo. Aua e foliga mai, seiloga lava ua manaomia e le Malo se fesoasoani mai ia i latou, ona faatoa fai lea o se Tulafono e fesoasoani ai, ae o le mea taua, o lea ua amanaia i le aso. Sa i ai lava le popolega ona o le tulaga i Kamupani foi o lo o aitalafu, ia o lea o le a faaoga le Tulafono lenei, e aveese ai nisi aitalafu tuua, ae leaga o le mea o lena e aoga.

Sa i ai foi le manatu, o le a le mea e le ave ifo ai se tulafono faapea e fesoasoani ai i le tatou Manu Samoa, o lo o tatalo mai le Iuni i tagata lautele, ae leai se faamanuiaga e toe momoli atu. O lea sa auai foi se manatu i le tulaga lea, aafia atu ai ma tatou ia o tagata faigaluega a le Malo. Aua ne i le [amanaia aua e aoga foi le fesoasoani atu i tulaga faapea.](#)

Ona ou oo mai lea i le tulaga lea i teutusi a faifeau. Faafetai tele ua toe faamalamalama mai lea mataupu. Sa i ai lava le agaga e le lavea le vaega lea i le taimi muamua sa faamalamalama mai ai le Tulafono. A o lea ua maua atu i le aso, o lea ua outou toe fai atu i toeaia, aumai la le mea lea, ae toe tuu atu le mea lea. E tusa la lea ua foai i ai le isi mea, ae aumai pea le mea tele.

O le mea taua o lena ua i ai le agaga faafetai i lau Afioga i le Minisita, e momoli atu ai le faafetai tele i lau Afioga ona o le tulaga i le va foi ma nai toeaia.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

E pau lea o se manatu lau Afioga i le Fofoga Fetalai, ou te iloa e aoga ia taua le luaselau pasene lea, ona o le fesoasoani e avatu i o ma toe aumai. Ma le faaaloalo lava faafetai.

**FOFOGA FETALAI:** Tulai mai le sui usufono mo Falealili i Sasae

**Afioga FUIMAONO TEO SAMUELU TEO (Falealili Sasae):** Faafetai mo lou avanoa lau Afioga i le Fofoga Fetalai, manatu e le umi se manatu o lea ua taea i nisi o finagalo o sui a usufono o le vaega muamua sa tau tatalo atu ai o le toe fai o le tatou mea lea o le, Tax Return ina ia fai a tatou tax e pei o le mea na masani ai, ae faafetai o lea ua afea i le finagalo, ia faatasi ai foi ma le tatalo a le uso a sui usufono o Faleata, manaia tele lenei Tulafono e fesoasoani ai tele i le tatou Au Lakapi, ona o lea ua maua ma ua outou vaai i ai ma outou silasila, o lea foi ua amata ona ausulusulu le tatou Manu Samoa e tausaili tupe e faatupe ai nisi o vaega. O le vaega muamua lava faafetai i lau Afioga i le Minisita aemaise foi o le Pulega mo lenei Tulafono Tau Faaofi. Ou te manatua le Taaloga o le 2007 na aumai ai foi le Tulafono Tau Faaofi lenei, a o le upu moni lava, e pei e foliga i le tatou vaai e tele, ae le i ausia, e le i ausia le target sa sue i le na taimi i tatou tupe ia, na faaagaaga mo kamupani, e le tele foi ni kamupani sa faapea na totogi ia ni meaalofoa foi ia pe sa auina mai le latou fesoasoani. O lona uiga, o se Tulafono foi ma o se vaega foi ua alagataua ona fai. Aua o le upu moni lava, e le taitai lava le tupe lea e faatino ai ia Taaloga o le Pasefika, e le taitai afa, ae pau lea o se vaega e autilotilo agai i ai e maua ai se tupe faaopoopo aua le tapenaga o taaloga. E sao ua laitiiti le taimi, ae mo lo outou silafia, e le i leva ona auina mai ia taaloga i lo tatou atunuu ma faalauiloa mai ma faamanuia ai tatou, aua leaga e le o tatou na tuu e host, a o lea ua see mai ia Tonga le....a o lea la ua faamanuiaina, e le gata i le faaaga o facilities ua i ai, ia a o se na foi tupe maua o le a maua e tagata e omai i taaloga, aua e le gata i tagata taaalo, a o i latou foi e omai e tafafao mai i le taimi lea. Ou te matua lagolagoina, sa i ai lou manatu e le lava le 200, sa ou faapea e tuu i luga i le 250% e ave i kamupani. Afai e popole ia le sui a usufono ona o tupe aitalafu a kamupani, o le taimi tonu lava lea e tataua ona aumai ai loa e totogi, e sili atu le totogi mai o sina mea i totonu i lo le fiu o le Matagaluega e usu le pese lea o le tuli mai, tuli mai, e fiu e tuli. Ae pau lea o le vaega, e vave ai ona maua se tupe maua ia ma fesoasoani mai kamupani i totonu o le sailiga o tupe aua le tatou Taaloga o le Pasefika. Talosia ia i ai se tupe faaopoopo lata mai, aua ou te talitonu e tele tapenapenega, ae le o lava le seleni e faamatuu atu i le Tala Autu o le tatou Tupe mo le tapenaga o le tatou taaloga lenei.

O lona lua lau Afioga, faafetai o lea ua oo i ai se finagalo a lau Afioga i le Minisita, e lagolagoina, ae faamolemole sa i ai i le maliu i lou itumalo lou nuu i Salani i le weekend, o le saunoaga a Rev. Kolio aemaise o le tausi matagaluega ia Tupea ma nisi o faafeagaiga, e le i oo atu lava la outou Matagaluega e faamalamalama le Tulafono lea.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

Faamolemole se i tusi ane lava i lalo, pe mafai ona o nisi o le ofisa, se i faamalamalama lelei i nai au faifeau le tulaga o le lafoga lea. O lea lava e vevesi, luga lalo, a o lea e fai mai nai au faifeau, e le i oo mai lava nisi o le Matagaluega lea e faamalamalama mai le tulaga o i ai. Ina ne i te i ua galo, e le ave ifo foi le lagolago a le itumalo e galo ai faifeau e faamalamalama i ai.

E pei o lau tuualalo lena ae faafetai tele mo le Tulafono Tau Faaofi, a na faapea e avatu le Tulafono Tau Faaofi lea i le tatou briefing, ia e leai lava ni manatu tele e lagalaga, aua o le faalavelave o lea lava e....E maitauina i le Tulafono Tau Faaofi, e aumai lava i se tulaga faanatinati, pei e foliga e i ai se vaega foi lele e te tau popole ai, ae a na avatu i le tatou briefing, e leai ni fesili a sui a usufono e manino lava i le tatou briefing lena ia ma uma ai lava. Ia manuia le tatou Fono, faafetai.

**FOFOGA FETALAI:** Malo. O le a lafo atu ia i lau Afioga i le Minisita i nisi o mea o totoe e le i faamalamalamaina, ae o lea lava e manino lava le tulaga o lo o i ai.

Malie lava lau Afioga i le....

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te lagona e tatau ona ou tulai atu e faasao le anoano o saunoaga sese ia sa fai. O le faaaafia o pisinisi ma fai fuafuaga ia, e tatau ona fai so latou sao. Aisea? O le tele o tagata ia e omai e manuia ai le aufaipisinisi, e tatau la ona fai so latou sao. A o lea faatoa uma atu nei lava ona pasi le Paketi e tele le tupe lea e ave e fai ai taaloga. O le tulaga foi i tapenaga, e le tau faia ni a tatou tapenaga, o le mea lena na faigata ai ona faatino e Tonga. O fale uma ia ua uma ona taoto, lea sa fai ai taaloga o le Commonwealth, o lea ua ready tatou, e le i ave la faavalevlea le bid lea a tatou. Na ala ona ave, o lea ua i ai ia fale taalo ma malae taalo. Pau lava la le mea o le toe faafou ia atili ai ona lelei atili. O lea foi la e laveai mai Saina latou te fausia. O le mea lea e faapea e le o lava, o lea e lava tupe. Ae tatau ona fai so latou sao, aua o latou lea e manuia i mea nei. E le faapea na o le nofonofo, o tagata nei e omai e o nonofo i faletalimalo, ai ai lea o latou pisinisi, ia ma faatau a latou oloa. A o ituaiga manatu sese ia sa faali, e le i lava le tapenaga, ua lava ma totoe le tapenaga.

Lau Afioga i le Fofoga Fetalai, o manatu ia na faaalua e le sui usufono o Salega e faafetai mai ai i le Tulafono, a lea ua manino, ua leva ona taoto le mea lea. E le faapea foi na tapa ni teutusi, e leai. O anafea na tapa ai e le Ofisa o Lafoga ni lafo o outou o matai e maua i mea ia o usu? E leai lava se mea o faia. O le a le mea o le a tapa ai fua ia mea faapena a faifeau? A o upu ia na aumai, o upu na faaoga e tagata e tetee i le Tulafono, ae leai ni mea faapena e tatau ona fai. Pau lava le mea lea na saunoa atu ai le Minisita, e faalauiloa atili ia le agaga o le Tulafono, leaga e lautele faaupuga ia e i ai, e mafai lava ona falo, falo, falo e le au ao lafoga, tau ane ai i mea ia.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

Ae oo mai nei e leai lava ma se isi o maua ni ona lafo o tapa e le Tulafono. O le ala foi lena o lea sa ou talanoa ai pea, talanoa ai pea, talanoa ai pea i le tulaga o mea ia e tatau ona fai e le Malo, o lea la ua faatino. E matua manino lava le faamalamalamaga a le Minisita. A o le faaupuga lea a Salega, faafetai ua fai le mea na ou fai atu ai. Oi, se aua e te faavalea le atunuu....

**Tofa Olo Fiti Afoa Vaai:** Lau Afioga i le Fofoga Fetalai, o se mea e fia faamalamalama.

**FOFOGA FETALAI:** Malie le sui usufono o Salega.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Se i uma lau faamalamalamaga, e oo foi la i au faaaliga sese ia na fai i le Roma, matua tele mea sese e te tautala i ai, talanoa i mea e te le malamalama ai.

Lau Afioga i le Fofoga Fetalai, toetiiti lava a ou oo i le mea la e fai ai lesi sauniga o lea e valaau mai ai, ae ou toe liliu mai lava ia aveese ma Faamaumauga nei manatu sese lea e fai i totonu o le Palemene.

Lau Afioga i le Fofoga Fetalai, aua. E mafai ona e faavalea se toatasi pe o se toalua o se atunuu, ae le mafai ona e faavalea le atunuu atoa. Lau Afioga i le Fofoga Fetalai, o le ala lena o lea ua ou tulai atu ai ma le faaaloalo.

O le tulaga foi lea na ave nei le faamalamalamaga a le Malo. Ua leva ona fai faamalamalamaga a le ofisa ae taofi ia faifeau, taofi ia tagata lotu e omai e faalogologo i mea ia. A na le taofia ae omai e faalogologo, e matua manino lava o le Tulafono. Ua faafia ona faasalalau atu, faasalalau atu mea ia a le Matagaluega e fai, ae le omai.

Lau Afioga i le Fofoga Fetalai, o le tulaga lena. E tatau ona faasao upu leaga e i ai i totonu o tatou Faamaumauga. E taua tele le mea lea. Soia tatou te soona lafo upu e le faamaonia.

**FOFOGA FETALAI:** Malo faafetai. Ma ou te faamalulu atu i le sui usufono,

**Tofa Olo Fiti Afoa Vaai:** Lau Afioga i le Fofoga Fetalai, ona o lea sa taua mai ia le sui usufono o lenei itumalo.

**FOFOGA FETALAI:** Malie le sui usufono, malie lau Afioga i le sui usufono o Salega i Sasae, se i ou fesoasoani atu. Na ou manatu e ao ona ou see atu e faamalamalama atili le mataupu lea, leaga o mataupu uma o Taulumaga o le tatou Fonotaga, o lea foi ou te faamaumaua, ia ma o le tiute lena o le Failautusi ma le Ofisa o le Fono o le faamaumau o a tatou felafolafoaiga, e manatu ina ia faafaigofie le tatou galuega. Ia ma e pei foi ona le mama i le Taitai o le Malo le tau faamalamalamaina o le itu lea.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

Silasila foi, o le teuteuga o le tatou Tulafono, o lea lava e manino le saunoaga a le Afioga i le Minisita, o le Tulafono e pei ona aumai i lafoga a faifeau, o tupe maua masani. A o le tulaga la lea e toe aumai ai le teuteuga lea, ne i aafia i alu alu se taimi, aafia i se finagalo o i latou o lo o galulue e faamaopoopo lafoga, ia ona tapa lea o tulaga ia e tai tolu masina faatoa tuumalo se isi faatoa maua se teutusi, ia pe alu alu tasi le tausaga faatoa fai se saofai, faatoa maua se teutusi a se faifeau. E le o ni tupe maua masani mea na. O tatou uma, o lea e tatou te iloa le uiga o le Tulafono na aumai muamua ma le teuteuga o le Tulafono lea ua aumai nei. Ua leva lava ona ta fia soso atu. A o le popolega i le Nofoa, ina ne i outou tau le pua ma lafo mai, faapea, ua ou le tutoatasi, ae ua ou taumafai e faamalamalama atu le Tulafono a le Malo pei ona tulai mai. Ae manino lava, aua e tasi lea vaega o le galuega a le Fofoga Fetalai, o le faamanino atu o a tatou galuega pei ona sau ai i futia ua sola.

O le mea la lea, alolofa ia sui usufono mamalu, se soia le milomiloa o a tatou galuega.

Ia o le tasi itu o lea lava ua malele le Afioga i le Palemia, ia ua fia ni faasalalauga a le Ofisa o Lafoga e afifio mai o le a feiloai i Tooa, o le a feiloai i fea, feiloai i Savaii, feiloai i Upolu, feiloai i Savaii, feiloai ai Upolu, ia ae le gausia i finagalo o le Aufaitatalo, tulou i sala le gagana o le upu foi e foi mai, faamagalo foi le upu a le Nofoa. Ae o fea ea tatou te o i ai? Tatou te o i tua e molimoli le feau i le fale o lea, ma le fale o lea, ma le fale o lea, ma le maota o lea? Leai o Samoa o le atunuu e tatou te galulue faatasi. O le mea la lea, lau Afioga e i le sui usufono, ia afai ua le oo i ai le faamalamalamaga, se o lou tiute lena o le faamalamalama o lau faifeau, ioe, leaga o tatou uma o sui usufono o lea e tatou te omai o tatou o sui usufono o itumalo ma le atunuu. E pei lava foi ona ou taua, o tatou na palota mai tatou te omai e faaleo o latou finagalo ma toe ave le feau i tua o le fono, ina ia faamalamalama ia i latou. O le mea la lea, o le a leai se faafinauga. Malie le sui usufono o Salega Sasae...

**Tofa Olo Fiti Afoa Vaai:** Lau Afioga i le Fofoga Fetalai, e faamalulu atu lava ona e le i taea lava i se faamatalaga a Salega le lē malamalama o se faifeau. Sa ou lagolagoina lelei lava le Tulafono, e leai ma se tulaga tau faavalea. E lua lava nai pepa e tuuina atu i le Afioga i le Palemia. Avatu i ai le Tusi Paia ma avatu i ai le Hansard o le talanoaina o le Tulafono Autu, e manino lelei lau talosaga i le Afioga i le Minisita, e aveese mai ia tulaga o teutusi.

**FOFOGA FETALAI:** Malie lau Afioga, o lau saunoaga o lea ua fai le mea sa e fai mai ai.

**Tofa Olo Fiti Afoa Vaai:** Ia o lea e sao, sao lelei lau Afioga.

25 IUNI 2018

**Tulafono Tau Faaofi o Teuteuga o le Tulafono o Lafoga o Tupe Maua  
2018 – faitauga faalua**

**FOFOGA FETALAI:** Ae manatua, o saunoaga faamaualuga na faauigalua pei e foliga e sao oe i le mea lena ua e fai mai ai, ae sese i le mea lea e fai mai ai le Malo, ma e pei e foliga a na leai le mea lena tou te fai mai ai e le oo le finagalo o le Malo i le itu lea.

O le mea la lea e faamalulu atu. Se o tatou, se tatou te.....e mau e faalele, mau foi ē e maitau. O le mea la lea, ou te faamalulu atu i le paia o le Palemene, leaga e le faamalieina lo outou finagalo e tatau ona tatou o o lea ua faamalamalama le Malo, ia ua muta ai foi i i le faamalamalama o le mataupu leni. Ou te faamalulu atu ai i finagalo o Afioga i sui usufono.

Ia ma.....se i tulai mai lau Afioga i le Minisita i nisi o mea e le i oo i ai le saunoaga, a o lea ua maea ona saunoa le Afioga i le Palemia. Ia se i toe tuu atu lava le avanoa i lau Afioga i le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, e talitonu o lena ua uma le faamalamalama a le Malo lau Afioga, e le gata i le Afioga i le Palemia aemaise foi lau Afioga i le Fofoga Fetalai, faafetai.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua i lona faitauga faalua.*

**TULAFONO TAU FAAOFI O TEUTEUGA O LE TULAFONO O  
LAFOGA O TUPE MAUA 2018 – iloiloga auiliili**

**FOFOGA FETALAI:** E tusa ai ma Tulafono Tumau, e amata le iloiloga auiliili i le Fuaiupu 2.

**FUAIUPU 2: Ua teuteuina le fuaiupu 27.**

*Faamaonia.*

**FUAIUPU 3: Ua teuteuina le fuaiupu 61.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Lafoga o Tupe Maua 2018.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Lafoga o Tupe Maua e aunoa ma se Teuteuga.*

25 IUNI 2018

**TULAFONO TAU FAAOFI O TEUTEUGA O LE TULAFONO O  
LAFOGA O TUPE MAUA 2018 – faitauga faatolu**

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua 2018 i lona faitauga faatolu.*

*Faaluaina e le Minisita mo Faatoaga ma Faigafaiva, Minisita mo Galuega, Felauaiga ma Atinae Eseese ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Fautulafono.*

**FOFOGA FETALAI:** Malo faafetai galulue, e leai lava se faiva e leai sona taunuuga, ua toai taunuu i le siui. E faapena ona momoli atu le faamalo ma le agaga faafetai. E talitonu le faamoemoe, o le agaga atoa o lenei Palemene ina ia faapena ona maua avanoa e faatino ai le atinae o le atunuu e ala i mea o lo o faapena ona finagalo i ai lea itumalo ma lea itumalo ina ia faatinoina o latou auala ma faasafua le tulaga o le tupe e pei ona pasia le Tala Faatatau Autu o le Tupe mo lenei foi tausaga ua faapena ona tatou feagai ai.

Ma o lea ua tatou toai taunuu i le siui o le tatou galuega, ma ou te manatu foi o se taimi ona saunoa lea o le Afioga i le Minisita e faatu le lafo mo le tulaga o le aso o faamoemoe le Kapeneta e tolopo i ai le tatou galuega. Ae avea lenei avanoa e momoli atu ai le faamalo ma le agaga faafetai, malo le usufono, malo foi le onosai, malo foi le faapalepale, malo foi le tofa i le Atua tatou te maua ai le agaga o le fefaamagaloi. E pei lava foi o le muagagana e masani ai tatou le pule, a sala tai, ia tonu uta. O le mea aupito sili lea ona taua. E tonu lava ma sao le sui usufono i lona ia finagalo, ae vagana o le musumusuga a le agaga e faapena ona faamalamalama ai se mea ua le manino i le maitau ma le silafia. Ia, e faapena foi ona faamalulu atu le Nofoa, a ua i ai se lafoga ua faapena ona le tautamalii i le faafofoga a le paia o lenei Palemene, ia o le agaga lava o le naunau ina ia tatou vave taunuu i le siui o le tatou galuega ae sagai ane ai o le tai aua le paia o le Kapeneta ma le mamalu foi ia i latou o lo o faapena ona galulue, ae a le mamalu o Ofisa Sili o Pulega ma Pule Sili o Matagaluega ma Faalapotopotoga a le Malo i le latou faiva alofilima o le faatinoina o Samoa aua se manuia o ona tagata lautele. Ia o le matou tala lea.

E faamalulu atu foi i le faafofoga tapuai mai a Samoa o lo o tui mai le mulipapaga. A ua i ai foi se upu ua tautua ai i le faafofoga mai a lau tapuaiga Samoa, ia malu ave i fale, o lau Palemene, e manuia ona o lau tapuaiga.

Ou te tapa ma le faaalalo lau Afioga i le Minisita mo Pisinisi ma Alamanuia mo se lafo.

25 IUNI 2018

### LAFO MO LE TOLOPOINA

**Afioga Hon LAUTAFI FIO SELAFI PURCELL (Minisita mo Pisinisi ma Alamanuia):** Faafetai i lau Afioga i le Fofoga Fetalai. Talu ai ona o lo o toesea atu le Afioga i le Palemia i se tuatuagia le maalofia, ia avea ia sou leo e faafetai atu ai i lau Afioga i le Fofoga Fetalai faapea foi le mamalu o le Ofisa o le Fono i le faafoeina o le tatou Fonotaga i lena vaiaso ua tuanai atu. O le tatou Fonotaga o le Tala o le Tupe, ua maea ma le manuia. A o lenei aso Fono mulimuli, e momoli atu le faamalo i sui usufono uma mo manatu lelei sa faaalua i tatou Tulafono Tau Faaofi i lenei taeao.

A ua ou tulai atu lau Afioga e faatu le lafo, *Ina ia tolopoina nei Taulumaga a le Fono Aoao a Samoa seia aulia le Aso Lua, 2 Oketopa 2018 e tusa ai ma Polokalame o Fonotaga a le Palemene ua uma ona faamaonia.*

*Faaluaaina e le Minisita mo le Soifua Maloloina ma le Minisita mo Tagata Tafafao Maimoa Mai Fafo.*

*Na faamaonia le lafo.*

**FOFOGA FETALAI:** Ia, o le a ou faaiuina le tatou Fonotaga i se tatalo.

*Na tolopo Taulumaga a le Fono Aoao i le itula e 10:34 i le taeao seia aulia le itula e 9:00 i le taeao o le Aso Lua, 2 Oketopa 2018.*